

01

《出下馆诗》

谢朓

麦候始清和，凉雨销炎燠。
红莲摇弱荇，丹藤绕新竹。
物色盈怀抱，方驾娱耳目。
零落既难留，何用存华屋。

02

《五日望采拾诗》

王筠

裁缝逗早夏，点画守初晨。
綃纈既妍媚，脂粉亦香新。
长丝表良节，命缕应嘉辰。
结芦同楚客，采艾异诗人。
折花竞鲜彩，拭露染芳津。
含娇起斜盼，敛笑动微嚬。
献珙依洛浦，怀佩似江滨。
须待恩光接，中夜奉衣巾。

03

《五日诗》

魏收

麦凉殊未毕，蜩鸣早欲闻。
暄林尚黄鸟，浮天已白云。
辟兵书鬼字，神印题灵文。
因想苍梧郡，兹日祀东君。

04

《奉和夏日晚景应诏》

杨师道

辇路夹垂杨，离宫通建章。
日落横峰影，云归起夕凉。
雕轩动流吹，羽盖息回塘。
薤草生还绿，残花落（疏）尚香。
青岩类姑射，碧涧似汾阳。
幸属无为日，欢娱尚（方）未央。

05

《端午三殿宴群臣探得神字》

李隆基

五月符天数，五音调夏钧。
旧来传五日，无事不称神。
穴枕通灵气，长丝续命人。
四时花竞巧，九子粽争新。
方殿临华节，圆宫宴雅臣。
进对一言重，遒文六义陈。
股肱良足咏，风化可还淳。

06

《端午日礼部宿斋有衣服彩结之贶以诗还答》

权德舆

良辰当五日，偕老祝千年。
彩缕同心丽，轻裾映体鲜。
寂寥斋画省，款曲擘香笺。
更想传觞处，孙孩遍目前。

07

《五丝》

褚朝阳

越人传楚俗，截竹竞萦丝。
水底深休也，日中还贺之。
章施文胜质，列匹美于姬。
锦绣侔新段，羔羊寝旧诗。
但夸端午节，谁荐屈原祠。
把酒时伸奠，汨罗空远而。

08

《同州端午》

殷尧藩

鹤发垂肩尺许长，离家三十五端阳。
儿童见说深惊讶，却问何方是故乡。

09

《岳州端午日送人游郴连》

徐夔

五月巴陵值积阴，送君千里客于郴。
北风吹雨黄梅落，西日过湖青草深。
竞渡岸傍人挂锦，采芳城上女遗簪。
九疑云阔苍梧暗，与说重华旧德音。